



EL' CHRONIQUE DU ZANTE.



J'AI VU EIN MARTIEN

--- « Vous z'avez vu, apa ? »

--- « Duss cha ? »

--- « Deins l' journal ».

--- « Ed quoi, Batisse ? »

--- « Les soucoupes volantes ».

--- « Cor toudis ? Ch'est pire qu' ein jeu, cha. D'pus l' temps que m'n' homme là, d' Quaroupe, y a vu deux Martiens deins s' gardin, cha n'arrêta pus. Mi je n' cros point à tout cha. J' cros putôt qu' los journalisses y n'ont pus rein à marquer deins leu' gazettes ».

--- « Et bein, mi, apa, je n' sus pas dé c't' avis là. J'y cros et y n'y a rein qui m' met puss ein rago qué d' vira que les journalisses y s' foutent ed' cheul qui d'ont vu... ».

--- « Tu veux que j' t'è diche, Batisse ? El monte y est sot. Et ch' n'est point d'aujourd'hui. J' m'è rappelle, peindant l' guerre ed' quatorse ! Ch'étot ein dix-sept,, quand cha dallot si mal. Eh ! bein, y a enne andouille qui a fait courir el' bruit qu' ein voyot, au soir, Jeanne d'Arc deins la lune, signe qué cha dallot aller mieux et qu' la France al serot sauvée. Eh ! bien cros mein si tu veux, huit jours après, tout le monte y avot vu Jeanne d'Arc deins la lune... L'imagination des geins al passe les bornes ».

--- « Acoutez apa, vous n'allex point m' croire, mais, mi-même, y a ein mois, j'étois sorti deins m' cour pour... bref, j'étois sorti deins m' cour. Eh ! bien, j'ai vu ein rond rouge qui passot qu-dessus d' l'Eglise et qui s'ein est dallé du côté du four à coke ».

--- « Vas-t'ein ! T'as vu doupe. Mi j'è n' cros point à tout cha... Ch'est des carabistoules ; quand j' l'arai vu,

ouais ! D' mes propres s'yeux ! Mais autermint, non ! Bein ouète ! Ch'est des contes ed' grand'mées !

--- « Alors, j' sus ein meinteux ? »

--- « Non, mais t'as pris les rêves pou' des réalités. Si cha continue, tout l' monte y d'ara vuénne, y n'y aura pu loc mi à point d'avoir vu... Non ! Ch'est inutile. Tant qu' ein Martien n' m'ara point tapé sus l'épaule et dit : « Zante Boursiau, j' t'è salve ! » je n' crorai point à tout cha... ».

--- « Zante, as-tu frumé l' pontis ? »

--- « Non ! »

--- « Va-t'ein l' frumer ».

--- « Ch'est cha, ch'est cor mi d' corvée ! ».

--- « T' peux vein faire cha. Cha fait enne heure qué tu lis l' journal, assis sus les cantiaux ».

--- « Eh ! l' soirée, ch'est pou quoi faire ? S'arpouser, j' peinsé ? »

--- « Ouais, teins v'la l' pile, qu' ein voche ess' couquer, mi j' sus mate ! ».

--- « Ouais va, donne mein chi cha ! ».

--- « Flavie ! ».

--- « Qu'est-ce qui n'y a d'arrivé ? ».

--- « Flavie, uève mein l' porte ! ».

--- « Mon Dieu ! Queu' malheur qui n'y a chi Zante ? Qu'est-ce qué t'as... T'es pâle comme la mort ! ».

--- « Mon Dieu, Flavie ! J'ai manqué d' mourir ed' peur ! Y avot ein Martien au pontis ! »

--- « Ein Martien ? ».

--- « Ouais, j' mé sus sauvé, y a crié, j'ai ramassé m' fourquet, el' long du mur d'el baraque au carbon et j'y ein ai foutu ein coup ».

--- « Ma mère dé Dieu ! Mais ch'est vrai ! Y a du sang sus les deints d' t'ein fourquet ! ».

--- « J'ai peinsé mourir sus plache, Flavie ! ».

--- « Faut daller kère les visins ! ».

--- « Ouais, buque deins l' mur, Flavie, j' n' saros pus rester chi tout seu... ».

--- « Ouais mes gins, vous m' crorez si vous voulez, mais j'ai vu ein Martien. Y étot au pontis dé l' cour. Ch'est pour cha qué j' vous ai révié tertouss, deins l' quartier ! J' tranno cor sus mes gampes. J' n'oseros point chi rester tout seu... ».

--- « N' t'è fais pus d' bile, Zante, ein est chi à six hommes à ch't' heure ! Qu'il y vienno tein Martien ! Mais commint qui étot fait ? ».

--- « Y étot grand et fort gros. Au moins cheint kilos. Ein bohomme deins l' genre dé m' biau garchon, Batisse, par exeimpe... Y avot ein casque ed' motocyclisse ed' sus s' tiête. Sus s' dos ein long mantiau d' fourrure. Il avot des bottes ed' caoutchouc à ses pieds. Mais si vous x'avotes vu s' tiête, toute verte, avec des yeux rouges et enne moustache à s' meinton ! ».

--- « A s' meinton ? ».

--- « Ouais, à s' meinton ! Pas au-dessus dé s' bouque, mais ein dessous ! J' l'arverrai tout m'y ie ».

--- « Toc ! Toc ! Toc ! Toc !... ».

--- « Uève el' porte Flavie, y a quelqu'un... ».

--- « Ouais Zante ! Pour mi ch'est... Mon Dieu, ch'est l' Mar... Au secours ! ».

--- « Non aman ! Ch'est mi, Batisse, j'ai voulu faire enne force à apa. Mais j' voudros pouvair avoir ed' l'iau oxygénée ou bien d' l'éther, y m'a donné ein coup d' fourquet deins m' cantiau l... ».

GRANDE VENTE

RÉCLAME

du 9 au 23 Octobre

eur de Beuvry,
isse, a dédicacé
es d'exemplaires
ouvrage